



Republika e Kosovës
Republika Kosova- Kosova Cumhuriyeti
Kuvendi i Komunës



Komuna e Prizrenit
Opština Prizren – Prizren Belediyesi

PROCESVERBALI

Nga mbledhja e Solemne e Kuvendit të Komunës, mbajtur më 17.02.2026, duke filluar nga ora 09:00, në sallën për mbajtjen e mbledhjeve të Kuvendit të Komunës së Prizrenit.

Ftesa për këtë mbledhje ishte për nderë të 18 vjetorit të pavarësisë së Republikës së Kosovës.

Mbledhja u hap me Himnin Kombëtar Shqiptar dhe Himnin e Republikës së Kosovës.

Mbledhja u kryesua nga Kryesuesi i Kuvendit të Komunës, z. Simir Krasniqi.

Simir Krasniqi (Kryesues): Të dashur qytetarë të komunës së Prizrenit, shumë të nderuar familje të dëshmorëve, të nderuar invalidë, veteranë të luftës së ushtrisë çlirimtare të Kosovës, shumë i nderuar kryetar i komunës zoti Shaqir Totaj, nënkryetar për komunitete zoti Furkan Bytyç, të nderuar anëtarë të kuvendit, drejtorët e ekzekutivit, i nderuar deputet zoti Gashi, të nderuar përfaqësues nga konsolata Turke, përfaqësues nga FSK-ja, përfaqësues nga Policia, Kfori Turk, i nderuar rektori i Universitetit të Prizrenit zoti Alishani, të nderuar drejtorit i QKMF-së, të nderuar përfaqësues të komunitetit Fetar, përfaqësues të bizneseve, shoqërisë civile, media, të nderuar të pranishëm. Mirë se keni ardhur në seancën solemne të ftuar për nder të 17 shkurtit ditës së pavarësisë së Kosovës. Në nderim të gjithë dëshmorëve dhe të rëndëve për liri ju ftoj për një minutë heshtje. Lavdi!

Kam nderin dhe kënaqësinë që sot të hap këtë seancë solemne, një prej ngjarjeve më të rëndësishme në historinë tonë kombëtare, shpalljen e pavarësisë së Republikës së Kosovës. 17 shkurti i vitit 2008 shënoi një epokë të re, realizimi i aspiratave shekullore për popullin e Kosovës, për liri, demokraci dhe shtet të pavarur. Kjo është një ditë historike, një ditë që na kujton sakrificat, mundin dhe përpjekjet e mëdha të brezave të tërë, për lirinë dhe shtetësinë e Kosovës. Pavarësia e Kosovës është fryt i sakrificës së dëshmorëve, martirëve, të luftës heroike të Ushtrisë Çlirimtare të Kosovës dhe mbështetjes së aleatëve tonë ndërkombëtarë në rrugëtimin tonë për liri dhe pavarësi. Derisa ne të gjithë po e festojmë këtë ditë, po e zbeh mos prezenca e liri bërësve dhe atyre që shpallen pavarësinë tonë, të cilët padrejtësisht po përballen në gjykatën speciale me akuza

të pabaza. Hashim Thaçi, Kadri Veseli, Jakub Krasniqi, Rexhep Selimi e të tjerë. Lusim që drejtësia të triumfoi dhe çlirimtarët të shpallen të pafajshëm. Sot më shumë se kurrë na duhet unitet dhe përkushtim për ta bërë Kosovën një vend ku rinia ka perspektivë, ku sundon ligji dhe ku secili ndihet krenar për shtetin e tij. Të festojmë këtë ditë me krenari dhe të vazhdojmë të punojmë së bashku për një Kosovë më të fortë, më të zhvilluar, duke ruajtur lirinë dhe duke ndërtuar një të ardhme më të mirë për të gjithë qytetarët tanë. Gëzuar përjetësisht pavarësia e Kosovës. Lavdi dëshmorëve, nderim të përjetshëm luftëtarëve të lirisë. Ju faleminderit.

Në këtë seancë solemne kemi nderin që tani të dëgjojmë përfaqësuesit nga subjektet politike me urimet dhe mesazhet e tyre. E fillojmë me përfaqësuesin nga Partia Demokratike e Kosovës.

Arianit Berisha (PDK): Të nderuar familjarë të dëshmorëve, invalidë e veteranë të Ushtrisë Çlirimtare të Kosovës. I nderuar kryetar, nënkryetar, kabinet i drejtorëve, i nderuar kryesues, kolegë kuvendar, të nderuar përfaqësues të policisë dhe ushtrisë Kosovës, përfaqësues të bashkësive fetare, i nderuar deputet, i nderuar rektor, të nderuar media dhe ju të pranishëm. Ky përvjetor i pavarësisë, për dallim nga vitet tjera ku zakonisht mbizotëron festa dhe gëzimi, sot na gjen të thyer emocionalisht. Por ashtu si në vitet e luftës kur sa më e madhe ishte forca e agresorit, aq më e madhe ishte edhe rezistenca e këtij populli, ashtu edhe ky përvjetor do të mbahet mend gjatë për krenarinë që ndiejmë secili prej nesh, si kundërpërgjigje ndaj atyre që po tentojnë ta ndryshojnë rrjedhën e historisë dhe ndaj atyre që po u bëhen krah. E për të ardhur deri te pavarësia e deri te kjo ditë e sotme, dikush dha gjithçka, dikush dha vetëm diçka, e shumë kush nuk dha asgjë. Shumë prej nesh sot besoj ëndërojmë që të kishim mundësinë që të paktën një ditë të vetme të kishim qenë pjesë e ushtrisë së lavdishme çlirimtare. Por një gjë e tillë është e pamundur. Ai kapitull është përmbyllur dhe do të mbetet në histori si epoka më e lavdishme e kombit shqiptar. Ndoshta sot ushtarët të UÇK-së nuk mund të bëhemi dot. Për ushtarët të Kosovës po. Secili nga pozicioni ynë të japim kontribut të vlefshëm që ta forcojmë shtetin e Kosovës, për të cilin u bënë shumë sakrificat e u derdh shumë gjak. Ata që po mundohen të na dëmtojnë, sot na kanë dhënë një mundësi të ardhur që ta bëjmë këtë gjë, por edhe që të bëhemi argat të UÇK-së, duke i mbrojtur vlerat e luftës si më e pakta gjë që mund të bëjmë. Po e shfrytëzoj këtë foltore për t'ju bërë thirrje të gjithëve pa përjashtim, që t'i bashkohemi sot protestës "drejtësi jo politikë". Sot të gjithë e kemi rastin të jemi UÇK, duke i treguar botës që jemi të bashkuar dhe nuk ka bindje politike që na ndan. Nëse dikur nuk kemi qenë pjesë e luftës për arsye të ndryshme, të dalim sot dhe t'i nderojmë, e t'i respektojmë ata që sakrifkuan çdo gjë që sot të kemi mundësinë të flasim e të jetojmë të lirë. Uroj që në përvjetorin e ardhshëm të pavarësisë, Hashim Thaçin, Kadri Veselin, Jakub Krasniqin, Rexhep Selimin, Salim Mustafën e çlirimtarët të tjerë t'i kemi në mesin tonë. Po e përmbyll këtë fjalim me disa vargje të xhaxhait tim, heroit të Kosovës, profesorit Xhemajli Berisha, të cilat më kanë frymëzuar vazhdimisht. "Lirinë nuk e meritojnë qyqarët, as frikacakët. Kush nuk derdh një pikë gjak për tokën të vet, kush nuk jep asnjë qindarkë për të, ai s'ka të drejtë as të varroset në të". Urime pavarësia, ju faleminderit.

Simir Krasniqi (Kryesues): Faleminderit. Ju faleminderit Arianit. E ftojme përfaqësuesin nga Lëvizja Vetëvendosje.

Karanfil Haxhillari (LVV): I nderuari kryesues, i nderuari kryetar i komunës, të nderuar përfaqësues të familjeve dëshmorëve, përfaqësues nga shoqata të dalura nga Ushtria Çlirimtare e Kosovës, përfaqësues nga ushtria nga policia, nga Kfor-i, përfaqësues nga komuniteti fetar, i nderuari rektor i UPZ-së, të nderuar mysafirë, të pranishëm, koleg kuvendar, të dashur qytetarë të komunës sonë. Sot është një ditë që na zgjon kujtesën, na forcon shpirtin dhe na mbush zemrën me krenari. Sot shënojmë 18-vjetorin e shpalljes së pavarësisë së Kosovës, 18 vite shtet. Në 17 shkurt 2008, u dëgjua zëri i një populli që për dekada kishte duruar padrejtësi, por kurrë nuk ishte dorëzuar. Ajo ditë nuk ishte thjesht një akt politik, ishte amaneti i brezave që u përmbush, ishte loti i nënave që u kthye në buzëqeshje krenarie, ishte gjaku i dëshmorëve që u shndërrua në simbole shtetërore. Sot, kur përmendim pavarësinë, ne përulemi me respekt thellë para atyre që sakrifkuan gjithçka për këtë ditë. Ata të cilët nuk kursyen rininë, ëndrrat, madje as jetën, që ne sot të jetojmë të lirë në tokën tonë. Liria jonë ka histori, ka plagë, por mbi të gjitha ka dinjitet. Të dashur qytetarë, Kosova jonë e vogël në hartë, por e madhe në zemër, ka kaluar nëpër sfida të shumta. Kemi dëshmuar para botës se jemi popull që di të sakrifkohen për liri dhe të punojë për paqe. Por rruga jonë nuk ka përfunduar. Gjykimi i një gjykate të padrejtë në Hagë po vazhdon ndaj krerëve të UÇK-së edhe sot. Prandaj pavarësia për ne duhet të jetë obligim. Obligim për të ndërtuar një shtet ku drejtësia nuk blihet, ku puna dhe ndershmëria vlerësohen, obligim për të qenë të bashkuar kur bëhet fjalë për interesa kombëtare, sepse shteti forcohet vetëm atëherë kur qytetarët e tij janë të bashkuar. Si përfaqësues në këtë asamble komunale, ne kemi nderin dhe barrën e shenjtë të shërbejmë qytetarët. Çdo veprim që marrim duhet të jetë i denjë për sakrificën mbi të cilët u ndërtua ky shtet. Çdo projekt që realizojmë, duhet të jetë dëshmi se liria po shndërrohet në mirëqenie. Le ta duam Kosovën jo vetëm me fjalë, por me punë. Le ta mbrojmë atë jo vetëm me emocione por me ndershmëri. Le ta forcojmë jo vetëm me përvjetore për çdo ditë. Urime 18 vjetori i pavarësisë së Kosovës. Lavdi të përjetshme dëshmorëve të Kombit. Faleminderit!

Simir Krasniqi (Kryesues): Faleminderit z. Haxhillari! E ftojme përfaqësuesin nga Lidhja Demokratike e Kosovës.

Haziz Hodaj (LDK): I nderuar kryetar i komunës zoti Shaqir Totaj, të nderuara familjet e dëshmorëve, përfaqësuesit e organizatave të dala nga lufta, përfaqësues të ushtrisë së Kosovës, policisë së Kosovës, të klerit fetar, të nderuar përfaqësues të bizneseve të Prizrenit, anëtarë të kuvendit, përfaqësues të medias, shoqërisë civile, të dashur qytetarë të Prizrenit. Sot shënoj me krenari ditën më të rëndësishme të historisë sonë, ditën e pavarësisë së Republikës së Kosovës, ditën e kurorëzimit të një rruge të gjatë, sakrifce, qëndrese dhe përpjekje kombëtare për liri e shtetësi. Kjo arritje historike u bë e mundur falë kontributit të gjeneratave të tëra, udhëheqës vizionare politike, luftës së Ushtrisë Çlirimtare të Kosovës dhe miqve tanë të përhershëm të Shteteve të Bashkuara të Amerikës dhe aleatëve europian, të cilëve u jemi mirënjohës përjetësisht. Dita e Pavarësisë së Kosovës na rikthen kujtesën, dhimbjen, sakrificën e mbi të gjitha shpresën për realitet. Le ta festojmë me krenari, përulësi dhe përgjegjësi ndaj së ardhmes, për ata që ranë për liri, për ata që besuan pa u lëkundur dhe për brezat që vijnë. Gëzuar 17 shkurtin, rroftë Kosova e lirë, sovranë dhe demokratike. Faleminderit.

Simir Krasniqi (Kryesues): Ju faleminderit. Fjalën e ka përfaqësuesi nga Bashkimi Demokratik.

Shukri Quni (BDP): Të nderuar familjarë të dëshmorëve, invalidë dhe veteranë të Ushtrisë Çlirimtare të Kosovës, i nderuar kryetar i komunës zotëri Shaqir Totaj, i nderuar kryesues, të nderuar kolegë kuvendarë, drejtor, përfaqësues të Ushtrisë së Kosovës, pasardhës të Ushtrisë Çlirimtare e Kosovës, përfaqësues të policisë së Kosovës, përfaqësues të Kfor-it, përfaqësues të bashkësive fetare, media, shoqëri civile, i nderuar rektor Alishani, të nderuar të pranishëm. Sot në këtë ditë të shënuar jemi mbledhur për të festuar 17 shkurtin ditën e pavarësisë së Republikës së Kosovës, ditën që shënon kurorëzimin e një ëndrrë shekullore dhe sakrificës së popullit shqiptarë të Kosovës. Kjo ditë nuk erdhi rastësisht. Kjo ditë erdhi si rezultat i një historie që vetëm një histori të gjatë me dhunë, shtypje, diskriminim përndjekje sistematike që populli ynë e përjetoj me dekada me radhë nga pushtuesi serbo-sllav. Shqiptarëve të Kosovës ju mohuan të drejtat më elementare njerëzore. Në gjumë, në arsim, në punë, dinjitet dhe në jetë. Por përkundër kësaj dhune, burgosje, vrasjeve, spastrimit etnik, populli ynë kurrë nuk u dorëzua. Ai qëndroi i fortë, i bashkuar dhe i vendosur se liria është e pashmangshme dhe kulmi i kësaj rezistence kombëtare ishte lufta çlirimtare e Ushtrisë Çlirimtare të Kosovës. UÇK-ja ishte domosdoshmëri historike! Ajo lindi nga dhimbja, nga padrejtësia dhe nga nevoja për mbijetesë. UÇK-ja ishte mburoja e popullit dhe shpresa e lirisë. Djemtë dhe vajzat më të mirë të UÇK-së lanë familjet, shtëpitë, lanë jetën e tyre, për një ideal të shenjtë. Dhe ky ideal ishte çlirimi i Kosovës. Ata luftuan me armë në dorë, por mbi të gjitha me besim të palëkundur se e drejta ishte në anën tonë. Gjaku i dëshmorëve tanë, është themel mbi të cilën u ndërtua liria dhe shteti ynë. Falë kësaj lufte heroike dhe dëshmorëve, falë edhe qëndresës së popullit dhe aleatëve tanë ndërkombëtarë, në krye me Shtetet e Bashkuara të Amerikës, Kosova u çlirua në qershor të vitit 1999. Dhe sot me 17 shkurt 2008, kjo liri u vulos përfundimisht me shpalljen e pavarësisë së Republikës së Kosovës. Ky ishte një moment historik jo vetëm për Kosovën, por për gjithë kombin shqiptar dhe për vlerat e lirisë dhe të demokracisë. Ndërsa sot, në këtë ditë feste, nuk mund t'i mbyllim sytë para një padrejtësie të madhe e cila po ju bëhet krerëve të Ushtrisë Çlirimtare të Kosovës. Ata që e themeluan shtetin e Kosovës. Hashim Thaçi, Jakup Krasniqi, Kadri Veseli, Rexhep Selimi dhe shokët e tjerë çlirimtarë që vazhdojnë të mbahen ende peng në Hagë. Ata udhëhoqën luftën çlirimtare, ata ishin në ballë të mbrojtjes së popullit dhe sot përballen me procese që e rëndojnë jo vetëm mbi individë, por edhe mbi vetë historinë e luftës sonë. Ne besojmë fuqishëm se lufta e UÇK-së ishte e drejtë, e pastër dhe çlirimtare. Asnjë gjykatë nuk mund ta tjetërsojë të vërtetën historike. Asnjë proces nuk mund ta njollosë sakrificën e popullit që ka luftuar për mbrojtje dhe liri. Kosova ka obligim moral, politik dhe historik t'ju qëndrojë pranë luftëtarëve të saj, pranë vlerave të luftës dhe pranë të vërtetës. Sot, në përvjetorin e 18 të Pavarësisë së Kosovës, ne përulemi para dëshmorëve, para martirëve, para atyre që dhanë më të shtrenjtën lirinë, duke filluar prej komandantit legjendar Adem Jasharit dhe familjes së tij, familjes Haradinaj, heroit të kombit Remzi Ademaj, komandant Petriti, heroit Xhevat Berisha, Selajdin Berisha, Agim Shala dhe të gjithë dëshmorët që dhanë jetën për lirinë e sotme që ne e gëzojmë. Si institucione komunale dhe si shoqëri kemi përgjegjësi të madhe ta ruajmë shtetin, ta forcojmë ligjin, ta mbrojmë lirinë dhe ta ndërtojmë Kosovën ashtu siç e kishin ëndërruar dëshmorët. Pra një Kosovë të drejtë, të zhvilluar me perspektivë për brezat që do të vijnë.

Le të jetë kjo ditë zotim, se Kosova do të ecë përpara, e bashkuar, krenare dhe e pa lëkundur në rrugën e saj shtetërore. Lavdi dëshmorëve të kombit. Lavdi Ushtrisë Çlirimtare të Kosovës. Në emër të Bashkimit Demokratik për Prizren dhe kryetarit Zafir Berisha, gëzuar të gjithëve 17 shkurtin, ditën e pavarësisë së Kosovës. Ju faleminderit.

Simir Krasniqi (Kryesues): Faleminderit. Vazhdojmë me Aleancën për Ardhmërinë e Kosovës.

Agim Muqaj (AAK): I nderuar kryetar Totaj, ekzekutiv i nderuar, kryesues i nderuar. Unë përshëndetjen dëshiroj ta filloj me përfaqësuesit dhe trashëgimtarët drejtpërdrejtë të Ushtrisë Kombëtare të Kosovës, forcat të sigurisë së Kosovës dhe shërbimin policor të Kosovës. Të nderuar klerik, i nderuar zotëri Alishani, i nderuar deputet Gashi, faleminderit për pjesëmarrjen, të nderuar përfaqësues të shoqatës të dala nga lufta, i nderuar komandant Xhemshit Krasniqi, ikona e ushtrisë shtetërore të Kosovës në rrethin e Prizrenit. Faleminderit për pjesëmarrjen tuaj. Të nderuar kolegë kuvendar, të nderuar qytetarë të Prizrenit, të Kosovës dhe të gjithë shqiptarëve ku jeni. Jam krenar që gëzoj plagët e lirisë, që mora pjesë drejtpërdrejt në luftën e Ushtrisë Çlirimtare të Kosovës. Por sigurisht se jam i lënduar, asgjë nuk më dhëmbin plagët e mia dhe gjithë plagët e gjithë shokëve, të lënduar të gjithë jemi me një padrejtësi që po i ndodh popullit tonë të Kosovës. Jo veç ne si shoqëri, unë mendoj se edhe kjo tokë nuk mund të jetë e qetë pa u kthyer sa më shpejt presidenti Hashim Thaçi, njeri themeltar i Ushtrisë Çlirimtare të Kosovës. Pa u kthyer Jakup Krasniqi, Rexhep Selimi dhe të gjithë ata që gjykuan padrejtësisht atje. Ju lutem, sigurisht se nuk mund ta ndjej veten mirë. I shihni rrethanat në çfarë rrethanave po përjetojnë. Ndaj procesit të milosheviçit, ishin vetëm 60 shqiptarë që dëshmuuan në atë proces. Çfarë ironie? Kurse në procesin e bashkëluftëtarëve tonë, ata që dhanë më së shumti për këtë vend, morën pjesë mbi 200 shqiptarë, të cilët bashkëpunuan, u manipuluan, u paguan me një proces i cili që nga fillimi ishte i manipuluar. Kjo është një padrejtësi që i ka ndodhur këtij vendi. I lutem Zotit që të gjithë kjo shoqëri që të vetëdijësohet dhe t'i presim ata njerëz sepse sigurisht se nuk mund të jetë e qetë as toka dhe as ne. Unë në këtë ditë të sotme, sigurisht se gjithmonë që nga pas lufta kam qenë edhe kritik, pavarësisht se kush ka udhëhequr në Prizren dhe kudo. Unë kisha dashur që edhe kryetari Totaj, edhe ekzekutivi, që për kategoritë e luftës mos ju bije mend, vetëm kur ka 12 qershorë, vetëm kur ka 17 shkurt apo 28, por ndaj kësaj shoqërie duhet të jemi për çdo ditë dhe të japim privilegjin e merituar djemtë dhe vajzave dhe familjeve të tyre si në punësim, rehabilitim dhe kudo. Po nga kjo foltore i drejtohem kryeministrit të Kosovës që qysh në dy-tri seancat e para ta ri sjellë ligjin në mënyrë urgjente që të rregullohet që të mbrohem me dinjitet dhe me ligj dhe jo me subvencione vetëm ata kur dëshirojnë. Urime të gjithë shqiptarëve kudo që janë, kjo ditë dhe dhashë Zotit që pavarësia e vitit të ardhshëm të na gjejë së bashku me të gjithë ata që na mungojnë në vendin tonë. Faleminderit.

Simir Krasniqi (Kryesues): Ju faleminderit. Vazhdojmë me përfaqësuesen nga Nisma Social-Demokrate.

Albulena Balaj-Halimaj (Nisma): Faleminderit kryesues, i nderuar kryesues, i nderuar kryetar Totaj, i nderuar deputet Gashi. Të nderuar përfaqësues të policisë, të nderuar përfaqësues të FSK-së, të institucioneve të besimeve fetare, i nderuar rektor dhe të nderuar të gjithë ju të pranishëm.

Sot më lejoni që nëpërmjet vëllaut tim që qenka i ftuar si veteran i UÇK-së, të përshëndes dhe të uroj secilin veteran dhe secilën familje që dha kontributin e pa çmim për këtë ditë të sotme. Sot shënojmë 18-vjetorin e shpalljes së pavarësisë së Kosovës, ditën kur me 17 shkurt 2008 në Kuvendin e Republikës u vulos vullneti i popullit tonë për liri dhe pavarësi. Kjo ditë është kurorëzim i sakrificës së brezave të tërë, është amaneti i atyre që nuk u përkulën, i atyre që besuan se Kosova një ditë do të duhej të bëhej e lirë dhe sovrane. Është dita kur ëndrra u bëra realitet, kur shteti ynë u ngrit mbi themelet e gjakut dhe sakrificës. Ne përulemi me nderim para dëshmorëve të kombit, para familjeve që sakrifkuan më të shtrenjtit për lirinë tonë, para veteranëve e invalidëve të UÇK-së. Ata janë meritoret e lirisë. Ata janë arsyeja pse sot flasim lirshëm, jetojmë lirshëm në shtetin tonë dhe ndërtojmë lirshëm të ardhmen tonë. Por liria nuk është vetëm çlirim nga pushtimi, liria është edhe përgjegjësi. Shteti ynë nuk mund të ndërtohet vetëm me fjalë e me simbole, ai ndërtohet me institucione të forta me ligj që vlen për të gjithë, me barazi para ligjit. Ndërtimi i shtetit të së drejtës duhet të jetë angazhimi ynë i përditshëm. Pa drejtësi, liria mbetet e cunguar, pa barazi para ligjit, shteti mbetet i brishtë. Sot në këtë përvjetor ne festojmë, por edhe reflektojmë, a po e ndërtojmë Kosovën ashtu siç e ëndërruan ata që ranë për të? Le të mos harrojmë, shteti që duam është ai ku askush nuk është mbi ligjin, por ku ligji është i barabartë për të gjithë. Është shteti që respekton luftën e drejtë, që ndërton paqe të qëndrueshme mbi drejtësi të vërtetë. Kët 17 shkurt, krahas festës së pavarësisë, do të organizohet edhe një protestë në mbrojtje të luftës tonë të drejtë, e cila po gjykohet në Hagë. Kjo protestë nuk është kundër askujt. Ajo është një thirrje për drejtësi, për dinjitet dhe mbi të gjitha për drejtësi në gjykim. Sot atje, në atë që shumë kush e quan beteja e fundit e UÇK-së, po përballen katër drejtues të luftës sonë për liri dhe shtet të pavarur: Hashim Thaçi, Jakup Krasniqi, Kadri Veseli dhe Rexhep Selimi. Në deklaratimet e tyre, në fillim të procesit, ata jo vetëm që u deklaruan plotësisht të pafajshëm, por me kokën lart theksuan se UÇK-ja nuk ka qenë ndërmarrje e përbashkët kriminale, siç pretendon prokuroria, por ndërmarrje e përbashkët çlirimtare e një populli të robëruar, me në krye komandantin legjendar Adhem Jashari. Sot, kur jemi në fund të procesit, pas më shumë se pesë vite, është bërë më se e qartë se fjala që ata e thanë në fillim ka marrë peshë tjetër. Tani më kanë peshën e të vërtetës absolute, se UÇK ishte dhe mbetet një ndërmarrje çlirimtare e një populli të robëruar. Gjatë gjithë kësaj kohe, ata kanë qëndruar me dinjitet duke mbrojtur jo vetëm veten, por edhe karakterin çlirimtar të luftës sonë. Ne besojmë se drejtësia është themeli i shtetit që kemi ndërtuar, por drejtësia nuk duhet të jetë selektive. Prandaj është e domosdoshme që drejtësia ndërkombëtare ta trajtojë historinë tonë me paanshmëri dhe sa më shpejt t'i lirojë heronjtë e luftës dhe të paqes, në mënyrë që ata të kthehen në vendin e tyre për të cilin luftuan dhe pranë familjeve të tyre. Sot në 18 vjetorin e shtetit tonë, ne duhet të jemi të bashkuar në festë dhe në kërkesën për drejtësi, sepse një Kosovë e bashkuar është një Kosovë shumë më e fortë. Faleminderit.

Simir Krasniqi (Kryesues): Ju faleminderit, vazhdojmë me listën Guxo.

Petrit Hoxhaj (Guxo): Faleminderit i nderuar kryesues, i nderuar kryetar, të nderuar mysafirë, nga të gjitha institucionet shtetërore, zonja dhe zotërinj, nëpërmjet kësaj foltore në emrin tim personal dhe në emrin e Partisë Guxo, ju urojmë 17 shkurtin, ditën e pavarësisë së Republikës së

Kosovës. Kjo ditë është ndër ditët më të rëndësishme në historinë tonë kombëtare, ditë që kurorëzon sakrificën shekullore të popullit tonë për liri, dinjitet dhe shtetësi. Është dita kur ëndrra e shumë brezave u bë realitet dhe Kosova u rreshtua në mesin e shteteve të lira dhe sovrane. 17 shkurti na kujton përgjegjësinë që kemi ne sot si përfaqësues të qytetarëve të Kosovës, të punojmë me ndershmëri, transparencë dhe përkushtim për një shtet ligjor, për barazi, drejtësi sociale dhe zhvillim të qëndrueshme për të gjithë qytetarët pa dallim. Në këtë ditë të shënuar nderojmë dëshmorët dhe martirët e kombit, familjet e tyre dhe të gjithë ata që kontribuan në rrugët e vështira drejt lirisë dhe pavarësisë. Sakrifika e tyre na obligon që Kosova të ndërtohet çdo ditë e më fortë, më demokratike dhe më e drejtë. Le të jetë 17 shkurti jo vetëm festë, por edhe ditë reflektimi dhe angazhimi për një të ardhme më të mirë për vendin tonë dhe për brezat që vijnë. Urime 17 shkurtin, ditën e pavarësisë së Republikës së Kosovës. Lavdi të gjithë atyre që dhanë lirinë për këtë vend. Faleminderit.

Simir Krasniqi (Kryesues): Ju faleminderit. Vazhdojmë me përfaqësuesin nga KDTP-ja.

Sevilja Hapçi (Kdtp): Sayın Belediye Başkanı, Belediye Başkan yardımcıları, meclis Başkanı, Müdürlerimiz, meclis üyelerimiz, Kosova Askeri mensupları, T. C. Başkonsolosumuz, İslam Birliği, Kosova Polisi, Prizren Üniversitesi Rektörü, Şehit aileleri, basın mensupları ve bizleri izleyen değerli Prizrenli halkı hepinizi saygıyla selamlıyorum. KDTP temsilcisi olarak Kosova Cumhuriyetinin bağımsızlığının 18. yılını kutlarım. 17 Şubat, Kosova halkının özgürlük uğruna verdiği mücadelenin ve ödediği ağır bedellerin sembolüdür. Kosova'nın bağımsızlığı bir günde kazanılmadı. Zor yıllardan geçti. Savaşın acılarını yaşadı, göçleri gördü, kayıplar verdi. Ama umudunu hiç yitirmedi ve sonunda özgür bir devlet olmayı hak etti. İşte bu yüzden bağımsızlık bizim için sadece siyasi bir karar değil, bir halkın yeniden ayağa kalkmasının hikâyesidir. Bu özgürlük; başta Adem Jashari olmak üzere, Kosova Kurtuluş Ordusu'nun (UÇK) verdiği mücadele ve şehitlerimizin fedakârlığı sayesinde mümkün oldu. Özgürlük uğruna canlarını feda eden tüm kahramanlarımızı saygı, minnet ve rahmetle anıyorum. Onların fedakârlığı, bu devletin temelinde sonsuza kadar yaşayacaktır. Kosova, farklı dillerin, kültürlerin ve toplulukların ortak evidir. Bağımsızlığımızın en büyük gücü de bu birliktir. Birlik içinde yaşama irademiz, geçmişte olduğu gibi bugün de Kosova'nın en sağlam teminatıdır. Bağımsızlık sadece geçmişin bir zaferi değildir; bağımsızlık, her gün emekle, adaletle ve dayanışmayla korunması gereken bir değerdir. Gelecek nesillere daha güçlü bir Kosova bırakmak hepimizin ortak sorumluluğudur. Bağımsızlığımız Kutlu olsun! Urime Ditën e Pavarësisë, Kosovë!

Simir Krasniqi (Kryesues): Vazhdojmë me përfaqësuesin nga Ythp.

Sevil Kazaz (Ythp): Sayın belediye başkanımız, Belediye Başkan yardımcılarımız, Prizren belediyesi yönetimi ve meclis temsilcileri, UÇK savaş gazileri aileleri, dernek temsilcileri, Kosova askeri birliği ve polis teşkilatı temsilcileri, TC. sn. Baş konsolosu, Prizren Üniversitesi Rektörü, Prizren İslam birliği başkanı, değerli katılımcılar hepiniz, saygıyla selamlıyorum. Kosova Cumhuriyetinin bağımsızlık kutlaması oturumuna hoş geldiniz. Bağımsızlığımızın 18. Yılında bizlere bu günleri emanet eden şehitlerimizi başta Adem Jashari, ailesini, Prizren'in eşsiz komutanı

Ekrem Rexha Komutan Drini ve Kosova Türkü şehidimiz Ersan Mazreku ve tüm şehitlerimizi rahmetle anıyorum. Ruhları şad olsun. Bu vatani bize emanet ettiler, bizim de üzerimize düşen görev elimizden gelen çabayı göstererek daha güçlü daha istikrarlı ve daha güvenli bir Kosova için çalışmak olmalıdır! Savaş yıllardır ülkemizi, vatandaşlarımızı çok yordu, hala kayıp olan yüzlerce Kosovalı var, onları bekleyen yüzlerce aile! Bugün hala haksızca Yargılanan Kosova'nın hükümet temsilcileri...Bu zorlu süreçlerden geçerken bu günlere nasıl geldiğimizi hiçbir zaman unutmamalıyız! Birlikte barış içinde yaşamamızın değerini bilmeliyiz. Bağımsızlık sadece ülkedeki Arnavut topluluğu için değil, savaşta evlerinde barışı korkuyla bekleyen, ülkesine sahip çıkan, bağımsızlık sürecinde hükümetin tüm kurumlarına destek sunan Türk, Boşnak, Rom, Aşkali, Mısırlı, Goralı ve Kosova'da yaşayan tüm toplulukları için de çok önemlidir. Çok etnikli bir ülkede yaşamakta olduğumuzun bilinciyle tüm toplumlara karşı saygılı, hoşgörülü, toleranslı davranarak, çocuklarımıza daha güzel bir ülke bırakmak bizlerin elinde. YTHP temsilcisi olarak Ülkimize, Kosova vatandaşlarımıza ve bizlerle sevincimizi paylaşan dostlarımıza Bağımsızlık yıl dönümümüz bir kez daha kutlu olsun. Saygılarımla teşekkür ederim. Urime Pavarësinë e Kosovës! Faleminderit.

Simir Krasniqi (Kryesues): Vazhdojmë me përfaqësuesin nga Vakati.

Eldis Abazi (Vakati):

Simir Krasniqi (Kryesues): Vazhdojmë me përfaqësuesin nga Sdu.

Dzengis Saliji (Sdu):

Simir Krasniqi (Kryesues): E ftojme kryetarin Shaqir Totaj për një fjalë rasti!

Shaqir Totaj (Kryetar i Komunës): I nderuar kryesues i Kuvendit Komunal, të nderuar asambleistë dashur përfaqësues të institucioneve, veteranë, familjet e dëshmorëve, qytetarë të nderuar, zonja dhe zotërinj, përfaqësues të Policisë së Kosovës, përfaqësues të FSK-së, përfaqësues të organizatave të dala nga lufta, i nderuari rektor, dëshiroj të përshëndes po ashtu edhe konsullin e Republikës Turke, përfaqësuesit e bizneseve, si dhe mediat. Është nder i veçantë që sot në këtë seancë solemne të jemi bashkë për të shënuar 18-vjetorin e shpalljes së pavarësisë së Republikës së Kosovës. Gjithsesi një moment historik që përmbledh në vetvete sakrificën, qëndresën dhe aspiratat shekullore të të gjithë popujve që jetojnë në Kosovë për liri dhe shtetësi. Jemi mbledhur këtu jo vetëm për të festuar, por për të reflektuar mbi rrugën që kemi bërë dhe mbi përgjegjësinë që mbajmë për të forcuar shtetin tonë çdo ditë. Rruga drejt lirisë u ndërta mbi sakrificë të mëdha dhe mbi vendosmërinë e një populli që nuk hoqi dorë kurrë nga e drejta për të jetuar i lirë. Lufta e drejtë e Ushtrisë Çlirimtare të Kosovës mbetet themeli i kësaj lirie dhe një kapitull i lavdishëm i historisë tonë. Në këtë rrugëtim historik, me rëndësi të thellë kujtojmë presidentin historik Ibrahim Rugovë, i cili me vizionin dhe udhëheqjen e tij të mençur në rrethinë ndërkombëtare, kontribuoi në fuqizimin e kauzës së Kosovës dhe në ndërtimin e themeleve të shtetit tonë. Po ashtu nderojmë Hashim Thaçin si udhëheqës të luftës për çlirim dhe si shpallës të pavarësisë së Kosovës në Kuvendin e Republikës së Kosovës për rolin e tij në momentet

vendimtare të historisë tonë. Sot, ndërsa shënojmë këtë përvjetor, mbetemi të përkushtuar ndaj vlerave të drejtësisë dhe të së vërtetës. Proceset gjyqësore po zhvillohen ndaj ish-drejtuesve të UÇK-së, perceptohen nga shumë qytetarë si të padrejta dhe në këtë ditë në Prishtinë, sot në ora 14:00 mbahet marshi kundër padrejtësisë si shprehje e solidaritetit dhe kërkesës për drejtësi. Të nderuar të pranishëm, pavarësia është përgjegjësi e përditshme, është angazhim për të ndërtuar institucione të forta, për të forcuar demokracinë, për të zhvilluar ekonominë dhe për të garantuar mirëqenie për çdo qytetar. Prizreni si qytet i historisë dhe i bashkëjetesës mbetet shembull i vlerave që na bashkojnë. Detyra jonë është që me përkushtim dhe përgjegjësi ta çojmë përpara këtë trashëgimi dhe të punojmë për një të ardhme më të sigurtë dhe më të zhvilluar dhe më të mirë për të gjithë. Le të jetë ky përvjetor një moment për të ripërtëri zotimet tona ndaj Kosovës për unitet, për përparim dhe për respekt ndaj sakrificës mbi të cilën është ndërtuar shteti ynë. Lavdi të gjithë atyre që sakrifkuan për lirinë tonë. Urime 18-vjetori i Pavarësisë së Republikës së Kosovës. Ju faleminderit për vëmendjen edhe për pjesëmarrjen.

Simir Krasniqi (Kryesues): Ju faleminderit i nderuar kryetar, duke ju falënderuar për pjesëmarrje. Ju ftoj të gjithëve së bashku të shkojmë për homazhin në varrezat e dëshmorëve dhe nga aty në mashin për drejtësinë në Prishtinë, në sheshin Skënderbeu në ora 2:00. Të gjithë së bashku. Urime dita e pavarësisë!



Kryesuesi i Kuvendit
Simir Krasniqi